

EKALESIA KELISIANO TUVALU
SUKESUKEGA O TE VAIASO TAPU 2013

Aso Tapu 24Mati -Aso Faa 28 Mati

THEME: **COSTS OF DISCIPLESHIP/KO TE TOGI O TE OLAGA TAUTALI KI A IESU.**

FAKATOMUAGA

Te fakatokaga mo sukesukega a tatou mo te Vaiaso Tapu mo te tausaga tenei 2013, e fakavae mai te Mataupu e penei, "***Ko te togi o te fai mo tino tautali ki a Iesu; Se kiloga ki te olaga tautali kia Iesu i mea ne tupu i te vaiaso o puapuaga o Iesu.***" I te gana palagi ko te "***The cost of discipleship; A practical reflections on the events of the passion week***". A te fakamoemoega maluga o sukesukega konei, ko te mea ke mafai ne tatou katoa o toe mafaufau me se olaga tautali ki a Iesu pefea, tela e fakaasi mai i loto i akoakoga a tou Aliko ko Iesu, kae maise ko te olaga tautali o ia ki te finagalo o tena tamana, ke fakataunu a te Galuega ki te fakaolataga o te lalolagi.

E lua a fakalavelave lasi e fakafeagai mo tatou Kelisiano i te vaitau tenei. Muamua, ko te manatu e fai pela me i te '***Fakaolataga, ko te talia fua ne tatou a Iesu i te fakatuanaki ko oti ei***'. E se tau o isi aka ne isi mea e tau o fakatino ne tatou. A tatou ko tau o nofonofo filemu, me kafai e toe fakatino ne tatou ne galuega lei ko tena uiga ko se aoga te Galuega o te Fakaolataga ne fai ne Iesu.

Lua, ko niisi Kelisiano ko nofo mo te manatu me i akoakoga a Iesu e uiga mo te olaga tautali ki a ia, e manakogina '***ke fakapuli katoatoa ne tatou tou tamana mo tou matua, tou kaiga kae tautali ki a ia. E tau foki o se kau tatou ki mea fakafenua i te mea ma fakalavelave ne latou tou mafaufau, kae tela la e maimau fua i ei tou ola, e pela mo muna a Iesu.***Konei a niisi o kiloga ko manatu ei te fakatokaga o mataupu sukesuke o te vaiaso Tapu mo te tausaga tenei, ke toe kilokilo aka tatou ki te mataupu tenei, "***Ko te togi o te olaga tautali kia Iesu***".

A te muna tenei, '***togi*** i te fakaogaaga i tou sukesukega e se ko te tau. E pela manafai ko fai ne koe se galuega lei kae ko tauigina koe io me

togigina koe ona ko tau galuega lei ne fai. Ikai, te manatu o te tino fakatoka suksesukega, a te fakaoga o te muna ‘togi i konei, e pela mo koe manafai e fano ki se sitoa kae manako koe ki se mea e tuku mai i te sitoa tena, e se mafai o puke fua ne koe o fano mo koe ma koe. Ikai, e tau muamua ke togi ne koe ki se tupe ko fatoa maua ei ne koe. Ko tena uiga a te **togi o te olaga tautali ki a Iesu**, ko te mafai ne tatou o fakatau mai a te avanoaga taua tenei ke maua ne tatou. E fakaasi mai konei i te olaga fai mo tino tautali io me ke fai mo se tokotasi o soko o Iesu, se avanoaga taua kii e se mo tino se talitonu kae mo Kelisiano talitonu kae fakatuanaki ki a Iesu. E se gata i ei, kae fakaataata mai foki me i te olaga tautali ki a Iesu se olaga e isi ne ana fakanofonofoga.

I muna a se tokotasi o tagata lauiloa i te Mataupu silisili e igoa ki a Deitrich Bonhoeffer....” a te olaga tautali kia Iesu se fakamasauaga malosi, me e ui e iloa te Alofa tauanoa o te Atua se mealofa e seai sona togi mo koe mo au, kae a te Alofa tauanoa tena e se togi mama a te aumaiga ne te Atua mo koe mo au. kae togi mafa. E pena foki te Vaiaso Tapu, se fakamasauaga maluga kii e uiga mo te maluga mo te mafa o te togi ne togi ne te Atua ke fakaasi katoatoa mai a tena Alofa fakamaoni mo te lalolagi.” I te manatu o Bonhoeffer, ko latou katoa ko la e tautali i kalafaga o Iesu ko te mea ke fai ne latou a te Alofa tauanoa tenei o te Atua mo vaega taua o olotou olaga ko la e ola ne latou, ka pena o fakasegina ne latou a vaega e uke o te olaga vave kae faigofie kae togi mama o te olaga tela e fua ifo te tino me ko ia e iloa. (A mea katoa ne fai ne ia/self centered life) A Kelisiano kola e fiafia o ola i se olaga vave faigofie kae togi mama penei, a latou e pela mo Kelisiano e se manako ke malaga fakatasi latou mo Iesu i te Vaiaso Tapu kae ko manako fua ke na lele latou mai i faigata mo puapuaga o te Vaiaso Tapu ki te fiafia Manumalo o te Toetu o te Aliko ko Iesu. Ko te fakalavelave me konei a latou ko la e fakaigoagina ko **‘Kelisiano o te alofa taunoa togi mama o te Atua’**. (Cheap-grace) Tou Aliko ko Iesu ne fautua mai me...” **te auala tela e faigata, ko te auala tela e tau atu ki te ola**” ko tena uiga Iesu e fautua mai faeloa ki a tatou...ke mo a e iloa se tino e vali faka-suka ne ia te mea tonu. A fakalavelave puapuaga mo te mate tiga o Iesu e se se mea loi e pela foki mo manatu o niisi lotu...pela ona ko Iesu foki loa ko te Atua io me lua ana feitu ko te feitu tagata mo te feitu Atua tela la i tena feitu Atua e se lagona ne ia ona mae tiga. Ikai, a mae tiga mo ona puapuaga i te vaiaso Tapu mo tena mate i te sataulo ne mea

tonu eiloa ne tupu kae ne oko foki ki a ia te fita mo te mapu tiga e penei mo tatou moi fai ko tatou. E seai se tino e mafai ne ia o ave keatea ne ia mea konei ne tupu i te vaiaso tenei.

Mo te Vaiaso Tapu tenei o te 2013 ko sasale tatou i ei, ke fakamoemoe fakatasi tatou ke sasale kae tautali fakatasi katoa tatou mo ia ke mafai ne tatou o oko atu fakatasi mo ia ki tena Sataulo kae maise ko tena Toetu Manumalo mai te mate mo te tugamau.

SUKESUKEGA O TE ASO MUAMUA : ASO TAPU LAUPAAMA 24:3:13

ULU O TE ASO: *KO FAKANOFOGA O TE OLAGA TAUTALI KI A IESU, MAI TE*

TAKUTONUGA A PETELU:

POGAI: Ke fakamalamalama te taua o pogai io me ko te koga ne fakavae mai ei a fakanofonofoga o te olaga tautali kia Iesu.

TUSI FAITAU: Maleko 8:34-36

FAKATOMUAGA

A fakanofoga fakavae o te olaga tautali kia Iesu e lavea ne tatou me fatoa aumai ne Iesu i te taimi ko oti ei ne takotonu ne Petelu me ia Iesu ko te Mesia eiloa mo te tama a te Atua, fakatasi mo te valo ne Iesu tena mate mo tena toetu. I te Maleko 8:31...I kona.. ko tena uiga ko te taimi tena ne sausautala latou ki te fesili me ko oi a ia. Ne fakaasi atu ne ia ki ona soko a te tulaga faigata ka oko ki a ia. Ne muamua o fakaasi ne ia ki ona soko fua a te tulaga faigata ka oko ki a ia kae oti i ei ff 34 ne toe kalaga atu a ia ki te vaitino fakatasi mo ona soko kae tena taimi ne faipati ei a ia ki fakanofonofoga mo te olaga tautali o latou ki a ia.”Kafai se tino e manako o vau i a au, e tau o fakapuli ne ia a ia eiloa, amo a tena sataulo, kae tautali mai i a au. Me ko so se tino tela e manako o fakasao a tena ola eiloa i a ia ka se maua ne ia, kae ko so se tino e fakamaumau a tena ola mo au e pena foki te Tala Lei ka fakasao ne ia.” Muamua, e taua te akoako atu ne Iesu a ona taugasoia i mata o te vaitino. Te vaitino

e lasi o fakaoga i tusitusiga a fai evagalia me fakasino ki tino ko fiafia o tautali i a Iesu. Ne tino ko talitonu. Tena uiga e fakataua ne Maleko a te mafutaga a Iesu mo tino tautali tela ko ona soko fakatasi foki mo te vaihono. Ko Mataio ne fakasi ne ia me ko taugasoa fua o Iesu ne faipati ki ei Iesu e uiga mo fakanofonofoga konei. (Mataio 16:24) Kae ko Luka ne fakaasi ne ia me ia Iesu ne faipati kia latou katoa. (Luke 9:23) Lua, e masani ma fai e faipati Iesu ki te vaihono (Ko Ia i tulaga kesekese o olotou olaga talitonu) A ia e muamua o akoako ne ia ona taugasoa ko Ia ko iloa lei ne ia me ne kalagagina ne ia, ka oti ko fakalauefa atu ei ne ia ana akoakoga ki niisi tino tautali ki a ia.

Fesoasoani mo te mataupu:

Muamua a Fakanofonofoga konei ne aumai ke fakatakitaki kae fakavae ki ei te olaga fai mo tino tautali. Ne seki aumai ke fai pela me ne tulafono ke fakasala ei tatou. Lua, ne aumai ko te mea ke fakasino fakamalosi kae fakamasaua mai me e taua tou olaga fai mo tino e tautali kae akoako atu ne tatou a tino e uiga mo te Tala Lei a Iesu Keliso. Tolu, e aoga foki ke akoako tatou ke iloa ne tatou me i te olaga fai mo tino tautali e taua kii. E se se olaga soona fai kae se ola e teateaki. Te olaga fai mo tino tautali e se se mea e tupu ko te tino loa ko fuli fakavave tena olaga o tautali, Ikai, kae te olaga tautali se mea e akoako ke ola kae fanake loa o ola malosi i se taimi loa. E se gata i ei, a fakanofonofoga konei e tau o fakamatalagina i te mainaga o valoaga a Iesu ki ona puapuaga mo tena mate ko Ia ne faipati ne ia mai mua o faipati ne ia a fakanofonofoga konei. Ko tena uiga e taua kia Iesu a fakanofonofoga konei me ko fakanofonofoga foki konei, e fakamaoni foki ei a ia ki tena olaga tautali ki te finagalo o tena Tamana e pena foki ona soko e tau o fakamaoni ki fakanofonofoga konei ke fakamaoni foki latou ki te olotou olaga tautali ki a Iesu.

“Fakapuli ne ia a ia e iloa, amo a tena sataulo kae tautali mai i au.”

Fakamunaga konei ne faipati ne Iesu e fakauiga tonu e iloa ki tulaga tela ko ona puapuaga mo tena mate. Te Ia Ia e tau o malamalama ona taugasoa me pela loa mo Iesu ko fakapuli ne ia a ia e iloa kae fai ne ia te manakoga o tena Tamana e pena foki ona soko. A te fakapuli i konei e se ko te taumafai o koe o fai se mea ke se manatua atu koe. Ikai kae ko

te mafaufau o koe ki mea faka-te Atua kae se ko mea faka-te tagata (Mataio16:23/Maleko 8:33) maise ko te ofo mate tenei ko fai ne Iesu ke fakataunu ei te finagalo o tena Tamana. E manakogina ke iloa ne tatou o fakaoga tou saolotoga o toe fakatoka tou olaga. Te fakafiti o koe ne koe e iloa e se foki ko te fakaseai katoa ne koe a ou manakoga.....Ikai kae ke iloa ne koe o toe fakatoka tou olaga ke fakataua ia koe ke fai te loto o te Atua kae se ko mea faka te tagata.

'Amo a tena sataulo' ko te fai o koe pela me se tino ko takumaseigina io me taku faka-segina. E mafai foki o fakauiga ki te fai o se mea lei mo sua tino. Ko tena uiga te fakaogaaga o te amo tou sataulo e fakatino fua i te mainaga o te mea tela ne fai ne Iesu mo koe. E se fakauiga pela ke fano koe o tuki se sataulo ko taumafai ei koe o amo . Ikai e fakauiga ki te tuku atu tou olaga katoatoa ke pule ne Iesu. Io me ke mate koe mo Iesu. E gali te fakamunaga a Luka "ke amo te sataulo i aso katoa" ko tena uiga ko te surrender o koe kia Iesu i aso katoa.

FESILI:

1. Fakamatala fakalei me ne a ou lagona, se a te taua o fakanofonofoga konei ki a koe?
2. Moi fai ko koe ko Iesu, e mata e isi aka ne niisi fakanofonofoga e mafaufau koe o fakaopopo ona ko fakalavelave e uke ki tou olaga tautali i aso nei?
3. Fakamatala me e pefea o amo ne koe a tou sataulo i aso takitasi?
4. Fakamatala ke maina me fakafiti ne koe a koe e iloa ,pefea?
5. E mata ne a niisi mea e manakogina ke fakafiti ne tatou i tou olaga tautali kia Iesu?

SUKESUKEGA O TE LUA O ASO : ASO GAFUA 25:3:13

ULU O TE SUKESUKEGA: ME KO SO SE TINO TELA E MANAKO O FAKASAO A TONA OLA EILOA I A IA, KA SE MAUA NE IA, KAE KO SO SE TINO E FAKAMAUMAU A TONA OLA MO AU PELA FOKI MO TE TALALEI KA FAKASAO NE IA.

TUSI FAITAU: Maleko 8: 35-36

POGAI: Ke fakamalosi tatou ke iloa ne tatou te manakoga tenei o Iesu mo tou olaga tautali ki a ia.

FAKATOMUAGA

Te fuaiupu katoa e 35 e fakamaina ne ia te taua o te fuaiupu e 34, tela

Ko te manakoga ke fakafiti ne tino a ia e iloa kae amo tena sataulo. Kafai la e se fai pena ne te tino tautali tena uiga ka maimau tena ola ka se maua ne ia. E taua te muna.... **'Me'** i te kamataga o te fuaiupu e 35...e fakamaoni mai ke fakataua te manakoga o te fuaiupu e 34. E tai lauefa kae maina te aumai ne Mataio a te fakavae o te faipatiga tenei a Iesu. (Mataio 10:32-33) I kona a Iesu e faipati fakatonutonu ki ona soko la e sefulu lua kae koi tuai o uga atu ne ia ke olo o lauga atu te Tala lei. Ne fautua ne ia latou e uiga mo fakasauaga kae maise a tino ka teke kia latou.(ff 16-25). Faakataua ne Iesu ke mo a latou e maku. Ko so se tasi e tumau i a ia ka tauigina.(ff26-36), kae ko te tino tela ka fakafiti ne ia a ia ka fakafiti foki ne Keliso i mua o tena Tamana. Te faigata mo fakalavelave konei o te olaga tautali i te molimau a Mataio e fakamatalagina i fakamunaga konei a Maleko i te tupulaga masei kae agasala tenei.(Maleko 8: 38)Ko tena uiga a te olaga fai mo tino tautali se tusaga e se faigofie. Ka fakafeagai latou mo uiga fapaupau kae mataga . kae taua ko latou ke tumau ia Keliso it e olotou molimau me ka maua ne latou te tau.

FESOASOANI MO TE MATAUPU:

“ **Tino tela e fakasao ne ia tena ola,ka se maua ne ia tena ola io me ka maimau tena ola**”...A te muna ola i konei e fakauiga ki tena tagata/self... io me ko te tulaga o tena olaga tautali. E se fakauiga ki te ola tela e fakamoemoe tatou i te ola e se gatamai lkai, ko te ola tautali io me fakalauefa ne Luka 9:25...himself heauton e sui ne ia te ola' tela fakaoga ne Mataio mo Maleko. Te muna ola' (psyche) i konei e se fakauiga ki te ola faka-te agaga io me ko te ola faka-te foitino physical life kae ko te self te tagata o koe tela e lagona ne koe a mea...e palani ne koe kae e fai ei tau filifiliga. Ko te self io me ko te tagata foki tena e fakaasi mai ei ou uiga.c.f o tou olaga tautali tena ka se maua ne koe. Io me ka fakamasei/destroy io me galo/lost.Ko tena uiga a te fakamunaga ...”Ko te tino tela e fakasao io me fakapelepele ne ia tena ola,ka se maua ne ia kae ko te tino tela e fakamaimau ne ia tena ola ka maua ne ia” e fakauiga te fakapelepele ki te tino tela e kiau ke fakaoga tena olaga tautali mo Iesu io me ko manakoga o te Talalei ka se maua ne ia.

Te fakaoga ne Iesu te muna tino tela e “**fakamaimau tena ola mo au**” e se fakauiga ke fakamasei tou olaga tautali io me loose tou ola tautali.E se fakauiga foki ki te eternal destruction kae ke fakamaumau tou ola ko tena uiga ko te fakaoga o te ola i tena tulaga lei/life in the essential qualitative sense. Tela ko te ola ne tatou te Atua i te olaga. Tenei te manakoga o Iesu ke fakamaimau ki ei tou ola me ka maua ne tatou. Te mea taua i konei ko te tino tela ka fakamaimau tena ola fakaoga ne ia mo Iesu mo te Tala lei, io me talia ne ia fakafeagai mo puapuaga o te fai o te loto o te Atua, ka maua ne ia te olaga lei i manakoga faka te agaga kae ko te tino tela e fakasaosao tena ola e se fia fakafeagai mo faigata mo puapuaga o te Tala lei io me ko fai o te loto o te Atua ka se maua ne ia te ola i tena katoatoa io me ko spiritual values o te ola.

- FESILI: 1. Fakamatala me ne a ou lagona se a te taua o te faipatiga tenei a Iesu ki tou olaga tautali i aso nei?
2. A Iesu e faipati ki te taua te la ka maua se a tena mea e fakauiga ki ei kae mafea?
3. E mata se a te akoakoga e maua ne tatou mai te mataupu o te afiafi tenei ke fakamalosi ei tatou i tou olaga tautali?
4. Se vaega olaga tautali pefea, tela e manatu ei a niisi me se tau mo tatou o fai tou tusaga mo te Ekalesia.

SUKESUKEGA O TE TOLU O ASO 26:3:13

**ULU O TE SUKESUKEGA: FAKAPULI TENA TAMANA MO
TENA MATUA TENA KAIGA.**

TUSI FAITAU Mataio10;37-38:

POGAI: Ke fakamaina fakalei me se a tonu te uiga o te fakanofoga tenei.

FAKATOMUAGA

E tasi tenei o faipatiga a Iesu e lasi tena pokotiaga kia tatou katoa Kelisiano. Kaati mo tino e se ne Kelisiano e se afaina ei te faipatiga tenei a Iesu, ona la e se fakataua ne latou a a koakoga a Iesu kae e se fakatino foki ne latou i olotou olaga. Kae mo Kelisiano te faipatiga tenei a Iesu ko fai mo mea e mavaevae ei kaiga ona ko te malamalama e maua ne tatou mai i faka-uigaaga io me ko fakamatalaga fakalauefa io me ko te fakauiga tonu e iloa ne tatou a te faipatiga tenei a Iesu.

“So se tino tela e sili atu tena alofa alofa ki tena tamana io me ko tena matua i lo o au, e se tau o fai mo oku soko; so se tino e sili atu tena alofa ki tene tamaliki tagata io me ki tena tamaliki fafine i lo o au, e se tau o fai mo oku soko.”

FESOASOANI MO TE MATAUPU

Mataio mo Luka e fakaopoopo mai ne laua a te fakanofoga tenei. la Mataio muna Iesu ko te tino tela e sili atu tena alofa ki tena kaiga e se aoga mo fai mo oku soko.” Ko Luka, muna Iesu e se mafai o fai se tino mo oku soko manafai e se ita atu a ia ki tena kaiga. Te fakamunaga tenei se vaega o faipatiga tela e masani o fakaoga faka fataoto./ Sematic figure of speech. Tela i konei a te muna ‘ita’ e fakauiga ki se alofa foliki Te fakamunaga a Luka ne fuli tonu mai i te gana Alamaika...te gana tela ne faipati ki ei a Iesu kae ko te veape ‘ita’ e se aumai ne ia tena uiga katoatoa. A te ita i konei

I te gana alamaika ko te se silia atu i te foliki o tou alofa. Ko te vaega e fakafoofogia me ia lesu i konei e se kaitaua kae e fafuesei foki tena akoako faeloa ki ona soko ke alofa ki olotou tuakoi kae i konei ne mafuli faatu ki tua i te vaitino kae faipati i se gana penei “Kafai se tino e se ita ki ona matua e se aoga mo fai toku soko”. E mafai pefea ne lesu o akoako mai ke alofa tatou ki tou tuakoi e pela e iloa mo tatou e alofa kia tatou kae toe mafuli mai ko fai mai ke se alofa tatou ki toe tino e iloa e sili te pili mai ki tou olaga.

Kafai e kilokilo fakalei tatou ki te faipatiga tenei a lesu e faka-faka tusa io me hyberbole, te la ko tena uiga ko fakaoga ne ia se fuaiupu tela e faigata o tupu i te olaga... E overstatement kae ke aumai ne ia se fekau tela e malosi kii. E lavea ne tatou me ne fakaoga foki ne lesu a vaega fakamunamunaga penei, ke aumai ne ia se fekau malosi.

1. E sili atu ke kati keatea tou lima.(Mataiao 5:29-30)
2. Te kamela e faigata o ulu atu i te pu o te niila.(Mataio 19:24. Niisi e talitonu me e taua te faipati fakapoi penei o lesu, ke fakaasi mai ei te taua o tena fekau tela e tonu e fakapoi, kae ka fui fakapuli ne Kelisiano.

I te gana Eleni te muna e fakaoga ki te ita ko te ‘*miseo*’ ko te ita e se fakauiga ki te kaitaua tela ko seai e iloa sou toe manako ki ei. E pela mo niisi ka ita ki olotou matua mo tamana ko se toe manako loa ki ei io me ko seai se taua o laua ki a koe, ikai.... a te ita *tenei miseo*’ko te ita tela ko fakapuli fua ne koe mo se taimi. E se ko tena uiga ko se taua ou matua i a koe io me ko koe ko seai sou interest i a laua.

I konei ko fakaoga ne lesu se fakamunaga e malosi kae fakapoi ko te mea ke faigata o fakapuligina kae ke manatua faeloa ei tena fekau mo latou ko la e fia tautali i a ia.

Te faipatiga tenei a lesu e se se fakamatalaga ke fai aka koe me e tau mo koe o se fakataua tou tamana mo tou matua. Ikai...A tou Alike e fakapau fua ne ia tou alofa mo te fakalogo i se auala malosi tela e pela mo te sili atu tou alofa kia ia i lo tou tamana io me ko tou matua.

E seai se akoakoga a lesu, ke se faka-taua tou kaiga io me ko tino kola e sili te pili mai kia koe. Tou tusaga mo tou kaiga io me ko tamana mo matua e tumau e iloa...e pela mo muna a

Paulo..kae kafai e isi se tino se fia tausī ki tena kaiga kae maise eiloa a tino o tena kaiga tonu,ko tena uiga ko teke ne ia a te fakatuanaki, ko sili atu a tena masei i lo o te tino e se kelisiano.....(1 Timoteo 5:8 (Luka 11: 11-13,2 Kolinito 12:14) Te fekau e fakamalosi mai ne lesu ke mafai ne tatou o fakamuamua a ia mo manakoga o Tala Lei e pefea te faigata o te Galuega mo te olaga tautali.

FESILI

1. E mata ne a fakalavelave konei e lavea ne tatou i akoakoga a niisi talitonuga ki te faipatiga tenei a lesu? E mata e tonu me se fakataua ne lesu tou Tamana mo matua kae maise ko tou kaiga?
2. E mafai pefea ne tatou o tali atu ki vaega akoakoga penei kae maise ko te akoakoga a te Tusi Tapu ki te taua o te Tamana ,Matua tamaliki kae maise te kaiga?
3. Ko niisi e faakaoga ne latou te faipatiga a lesu i te Luka e 9: 60-62
“Tuku a tino mate ke tanu olotou tino mate.....e fakapatonu ei te faipatiga a lesu me e se taua tou tamana mo tou matua.....E pefea fakamaina ne tatou te faipatiga tenei a lesu ke tali atu a mau ko nei.

SUKESUKEGA O TE FA O ASO: ASO TOLU 27:3:13

ULU O SUKESUKEGA: FAKAPULI A MEA KATOA- LUKA 14:25-33

TUSI FAITAU: LUKA 14: 25-33

POGAI: Fakamaina me se a te manakoga o lesu ke fai tatou mo tino tautali e tiaki mea katoa kae tautali kia ia?

FAKATOMUAGA

E mata e tonu loa lesu e manako ke tiaki a mea katoa kae tautali atu i a ia? E lavea ne tatou te manakoga tenei o lesu ne fai ki ana soko ko la ne kalagagina ne ia. Se manakoga

tela e maina faigofie kae malamalama fakalei tatou i ei. Matio 4:19 Ne fai atu a Iesu kia laua "Aumai i au kae ka akoako ne au a koulua ke po ne koulua a tino. I kona foki e iloa, ne tiakina atu a la tili kae ne olo atu mo ia." Te manakoga o Iesu i konei e fakasino tonu e iloa kia latou ko la ko manakogina ne Iesu mo te taimi tonu e iloa tena ke galue mo ia i te talaiga o te Tala lei. I te mataupu tenei e 14 e lavea ne tatou ko toe sae mai a te manakoga tenei o Iesu e tusa e iloa ko tulaga o fakanofonofoga mo latou kola e fia tautali i a ia. Te fesili tela e fakatakitaki ki ei tou sukesukega... me se a tonu te tulaga tenei e faipati kae fakauiga ki ei Iesu.

E tokouke Kelisiano e akoako ne latou me te manakoga o tou Aliko i konei ke tiakina a tou mea katoa kae tautali tatou i a ia, kae ko te fakalavelave me tokouke e iloa a lotu e akoako ne latou a muna konei kae e se mafai ne latou o fakatino kae maise ko lotu ko la e fakamatala ne latou te Tusi Tapu mai i te muna ki te munae iloa.

FESOASOANI MO TE MATAUPU:

Te faipatiga tenei a Iesu se faipatiga faka-fataoto e pela mo te faipatiga ne onoono tatou ki ei i te aso anafi. E hyberbole... e se fetau i o me faigata o fakatino i te olaga, kae e isi se fekau taua e taumafai Iesu ke aumai ne ia. E fakamaonia a te mau tenei ona me ko oti ne aumai ne ia e lua a tala fakatusa ke fakamaina ei tena fekau, kae ko toe aumai ne ia se fakamunaga faigata penei ke atili fakamalosi ei tena fekau. E pena foki i te fakaotiga o ana tala fakatusa e lua kona e uiga mo te tagata ne manako o faite tena fale mo te tupu ne fanatu mo ana sotia ki te taua. Ne aumai ei ne Iesu te fakamunaga tenei ke atili fakamalosi ei tena fekau tela e manako a ia ke malamalama ona soko io me ko te vaitino.

Ff 33 ...I te auala foki tena, e seai foki se tino o koutou e mafai o fai mo oku soko vagana ko fakaseai ne koe au mea katoa ko la e i a koe.

A te fakaseai ne koe au mea i te gana Eleni e se ko te fakaseai tela e pei ne koe ke galo se toe maua ne koe, kae ko te muna ko te *apotasso* ko tena uiga ko te say farewell to/take leave of; faka-fakatusa ko te tuku keatea ko te tuku fakatafa a manakoga ko la e fakatau fai olotou taua i tou olaga. ko te mea ke mafai o faite tou

olaga tautali ki manakoga o te Tala lei mo te Malo o te Atua. E mafai o lavea ne tatou a taumafaiga konei i te olaga o;

1. Petelu, lakopo mo loane, ne tiaki olotou tili(Luka 5:11
2. Levi ne tiaki tena galuega aolafoga(5:27-28
3. Sakaio. Tufa atu afa tena maumea ki tino mativa(19:8 mo niisi tino aka.

Kafai e tai mafaufau atu tatou ki faipatiga a lesu i ana tala faka tusa konei,ka tai maina atu loa tatou ki uiga o ana fakamunaga konei.

A te tala e uiga mo te tagata faite tena fale io me se taoa e akoako mai me e tau muamua koe o nofo ki lalo o galue a te aofaki o mea e manakogina fakatasi mo sene. Te akoakoga e lavea ne tatou me i te olaga tautali e manakogina foki ko te tino ke mafaufau mafa ki ei. Ke iloa ne ia me fia te mea tela e manakogina ke mafai ne ia o fakatino i tena olaga tautali. Tolu ke iloa foki ne tatou me i te olaga tautali e manakogina tau filifiliga mo tau tali e mautinoa. Ka se pela ei koe mo te tino tela e se palani fakalei te fale me ka iku ki te se palele. Te akoakoga a lesu e maina, e se mafai ne tatou o fai mo tino tautali manafai koi fakalotolotolu e iloa koe i ou manakoga. Kafai e seki tonu mo koe ke faite ou manakoga i luga i manakoga o te Tala lei, e sili ke se kamata koe o fano i te olaga tautali ki a lesu. Kae kafai ko tonu kae mautinoa i a koe me ko kafi ne koe o tuku fakatafa ou manakoga totino kae faite tou olaga ki manakoga o te Tala lei mo te Malo o te Atua. Ko seai la se fakalavelave i ei. Kae lesu e se akoako mai ke tiakina katoa a mea taua i tou olaga...ikai kae ko uiga tonu o te faipatiga a lesu ke fakatoka tou olaga tautali, ke mautinoa tonu ia koe me mafai ne koe o fai tou tusaga mo te Tala lei, me ikai.

FESILI:

1. Kafai ne lucky koe i te bingo i te afiafi nei ki se \$2,000 e mata ka pefea o fakaoga ne koe au tupe kona, e pela mo te faipatiga a lesu penei” E se mafai ne koe o fai mo oku soko, vagana ko fakaseai ne koe a au mea kona”
2. Fakamatala me faite pefea ne koe tou olaga i luga o manakoga o Tala lei? 3. Fakamatala me pefea o palani

fakalei ne koe tou olaga tautali kia Iesu. Kafai e mafai o fakaoga ne koe tou olaga i loto i te vaiaso i mea kola e masani o fai ne koe.? Fakamatala

ULU O SUKESUKEGA: KAFAI SE TINO E MA I AU,E PELA FOKI I AKU AKOAKOGA,I KONA A TE TAMALIKI TAGATA A TE TAGATA KA MA I A IA I TE TAIMI E VAU EI A IA I TENA MALU.

POGAI: Fakamalosi tatou o fai mo molimau fakamaoni ki a Iesu.

TUSI FAITAU.LUKA9: 26-27

FAKATOMUAGA

A te evagalia a Luka e pau mo Maleko. A te fakaogaaga o te muna ma e aumai ne laua i se tulaga se lei. Se tulaga tela a te ma se mea e masei. Ko te pokotiaga te la e aumai ne laua me kafai koe e ma ia Keliso mo tena Tala lei a ia foki ka ma i a koe manafai e vau a ia i tona 'Malu .

I te olaga faka-tatou a te uiga o te muna ma e pela me fakasino ki se mea e vao ne ia koe ke se mafai o fai ona ko pokotiaga ki a koe. A te fakaoga o te ma pela me se mea masei pela me se lasi te ai a o tatou ki ei ona ko tatou a te mea malosia tela e vao ne ia koe mai te faiga o se mea ko te se mafai ne koe o fakatino i mata o tino e tokouke. E tenei a te tulaga maluga o te ma tela e iloa ne tatou. Kae e tonu la me e uke foki a pogai ko la ko ala i ei o se mafai ne tino o fakatino se mea.

FESOASOANI MO TE MATAUPU

Ko te Evagalia a Mataio e se fakaoga ne ia te muna ma kae pela me fakaoga ne Mataio te muna takotonu mo te fakafitiiga o Keliso.E fakaoga i te Mataio 10:32-33 Ko te pogai e ala ei o ma te tino ia Iesu e mafai o manino i niisi fakamatalaga. I te Evagalia a Luka,a te faipatiga tenei a Iesu e uiga mo te tino mafai e ma i a ia e ma foki a ia i ei e soko mai tua ko fautuaga a Iesu, e uiga mo te

fakamataku ki te tino tela e faka-tulaga ne ia a ia mo te lalolagi ke maua ne ia a mea.(Luka 9:25) e isi ne pokotiaga ka fakafeagai mo latou i te aso fakaoti manafai latou e kau i te lalolagi. Ko te tulaga o te ma i konei e fesokotaki mo te tulaga se mafai ne tino o fakaasi ne ia i a ia e sokotasi mo Iesu, io me ko ia e ola ne ia Keliso. Ko tena uiga a ia e kau i te lalolagi. Ko te ata e tai maina atu ko te mafaufauga ite Mataio 10: 32-33. I konei Iesu e fautua ne ia ona soko ke mo a latou e matakū me i loto i fakasauaga mo fakalavelave kafai e fakaasi ne latou me ia latou e mo Keliso ka maua ne latou a te tau. Kae kafai e fakafiti ne latou a Keliso a latou foki ka fakafiti ne ia. io me kafai latou e ma a ia foki ka ma ia latou i taimi e vau ei a ia i tene 'Malu.

E lavea ne tatou i konei te ma e fesoko taki mo te fakafiti. Ko tena uiga te tino e ma i te Tala Lei e se ko te ma tenei pela mo koe e se mafai o fakatino se mea ona ko tino e tokouke..Ikai, kae ko te uiga tonu a te ma i konei ko te se mafai ne koe o tu mo Keliso ona ko manakoga o te lalolagi tela e maua ei ne koe a mea mai ei. I niisi fakamunaga, Ko te fakatulaga ne koe a koe mo te lalolagi ke maua ne koe ne mea, io me ko koe e kau i te lalolagi.

Ko te fakalavelave i konei, me i te pokotiaga tela ka maua ne ia tela e ma ia Keliso e faigata kii. A te fesili i konei me, e mata a te ma tenei o Iesu i te tino tenei manafai e vau a ia i tena 'Malu e fakauiga me ka se maua ne te tino tena a te Fakaolataga? Kafai e faitau tatou i te Mataio e 10:32-33 kae tuku fakapau ne tatou mo te Mataio e 16:27 e manino lei mai i tusi konei me i te fakamafa e lavea i kona ko te tau mo galuega lei ne fai. E ata fakaasi mai ne Mataio me i te taimi e toe foki mai ei Keliso ka tau ne ia (apodosei/tau ne ia te tino e tusa ko tena galuega lei ne fai.(16:27 Ko latou kola ne ma ia Keliso ka maua foki ne latou te ma o Keliso. A te ma o keliso e se fakapatino mai i konei kae e iloa ne tatou me e faka-salamo loto manafai se tino talitonu fakamaoni kae maua ne ia te ma io me ko te faka-fitigina ne Keliso.

FESILI:

1. Fakamatala me e fakatino pefea ne koe i tou olaga tautali ki a Iesu i a koe e se ma ia Keliso mo tena Tala Lei?
2. Fakalauefa aka me ne a uiga fakaasi e lavea ei i a koe e ma ia Keliso mo tena Tala lei?
3. E mata te se fano ki te fakaala a te fenua o te Maliu mo Toetu, se ma te mea na i a Iesu?, io me ko te mea loa ko seai ne mu meakai...pela mo fai foki la te fakaala?

KE MANUIA SUKESUKEGA O TE MALIU MO TE ESETA